



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

ISSF World Cup: Suruchi Singh-i gold medal angu

America nung kodanga yamai telemsa meliasü: Joe Biden



VOL. XXII ISSUE NO. 183 (ADOK 183)

DIMAPUR

YANGTEPNÜ THURSDAY

RONGCHII (APRIL) 17, 2025

₹ 5.00

NPCC-i Centre sorkar anema lungkak ait

Dimapur, April 16, 2025

(TYO): BJP-i aniba Centre sorkari opposition olatem nembangtsütsü atema tashiyim mapa inyakba anema All India Congress Committee (AICC)-i tanü linük ajungalen lungkak aitba sentong agitsü ayongzüka liasü.

AICC-i ayongzüka ama Nagaland Pradesh Congress Committee (NPCC)-ia Bodbarnü Nagaland nung lungkak aitogo.

Tanü NPCC-i tesem ana- Congress Bhavan, Kohima aser District Congress Committee (DCC) Dimapur-i Dimapur nung lungkak aitba sentongtem ayonga agiogo.

"Congress tanishirtem Sonia Gandhi, Rahul Gandhi aser K.C. Venugopal nungeri minorities aser OBCs temetentem atema ola adoker" ta MP aser NPCC President S. Supongmeren Jamir-i Kohima nung jembidang ashi.

Congress-i nübortem asoshi inyakba mapa anendaktsütsü atema BJP sorkari tanga onüktem benoktsü meranger ta pai ashi.

"Enforcement Directorate

(ED)-i National Herald shibangtsütsü meranger kechiyong iba osangkaket ajanga nübortem ola adoker. Modi'er sorkarisa Congress aser tanga opposition olatem nembangtsütsü meranger" ta NPCC Working President Khriedi Theunuo-ia ashi.

Dimapur nung Additional Commissioner of Income Tax office kima lungkak aitba sentong agia liasü.

"Iba ya democracy aser Constitution of India kümüzka ayutsü atema lungkak aitba dang masü saka mass movement ka lir. RSS aser BJP-i Constitution tamendakdak raksaja arur" ta NPCC Working President C. Apok Jamir-ia ashi.

"Congress tanishirtem anema kuli tejangia maliser Centre-i ED amshir. Congress Party-i sensakertem, nübo agi tangar memenepertem aser teküpoktiba jenjang nung alirtem asoshi noktakba agi Centre-i tashiyim agi onok anema mapa inyaker" ta Apok-isa ashi.

N Kitovi Zhimomi lenisüba kübok GPRN/NSCN longjemshir

Dimapur, April 16, 2025

(TYO): GPRN/NSCN nung Ato Kilonser N Kitovi Zhimomi mapa nungi anentsüba sülen ita 11 lir pa tanaben shimokogo. Designated camp Khehoyi nung Bodbarnü GPRN/NSCN reunion programme ka agiogo.

"2028 tashi pa Ato Kilonser inyaksü shim saka küm ka ser tesadang tsüngda pa kanga dang ajungbena menden nungi agien. Ajisüaka GPRN/NSCN inakyim nung Ato Kilonser ka no-confidence motion ka ajanga dang agentsü akok" ta Kitovi-i ashi.

"Naga nunger 16-Point Agreement ajanga tajangzüka aika agia arur aser wadang balala nung terenlok lir. 16-Point Agreement nung sign asüba ajanga Nagaland state angu aser iba sülen tanü asenoki terenlok nguyonga arur saka tarutsü pututemi kechia angutsü?" ta Kitovi-i ashi.

"Tang ya asenoki lanupututem atema lemtet shitak agitsü mapang lir. Asenoki lanurtem asoshi yimtenren mapa tajungba bentsür arua yutsütsüla" ta pai ashi.

"India sorkar den agreement ana agia lir, ka NSCN-IM den Framework Agreement aser ka NNPGs den Agreed Position lir. India sorkari agreement

anaprong shisadangtsüla aser common solution ka bener arutsüla" ta Ato Kilonser Kitovi-isa metetdaksü.

"Naga nunger asoshi agreement ka dang asütsü aser lemtet ka dang agitsü. Ibaji NNPGs mesüra NSCN (IM) atema dang masütsü saka Naga nunger ajak atema asütsü" ta paisa ashi.

Tang nungi onoki GPRN/NSCN (Unification) masü saka GPRN/NSCN nungja amshitsü kechiyong Unification indang nükjidong matong ta Kitovi-isa shisem.

"Küm 11 tashi GPRN/NSCN lemdanger lia aruogo saka iba ajanga ajak atema taküm nung temelenshi anguba mapang ka süogo. Tanü kanga dang tiptema tanishirtem melener aser taküm ka danga melalu. Nisung ajaki pei pei taginüba toktsüdi aser Naga nungeri aginüba nükjidong atongtsü atema külemi inyakdi" ta GPRN/NSCN Kilonser, G Naga-ia ayongzüka.

Tanü reunion asüba ya tang atema dang masü saka Indo Naga yimten melatet tashi aotsü ta paisa ashi.

Tang nungi Khehoyi Camp ya GPRN/NSCN Designated Camp asütsü ta iba sentong nungsa metetdaksü.

Tanü nungi Higher Education Department shibangtsütsü

Dimapur, April 16, 2025

(TYO): Combine Technical Association of Nagaland (CTAN) aser Nagaland Net Qualified Forum (NNQF) teloktemi asüng nungi Nagaland Civil Secretariat nung Higher Education Department office shibangtsütsü metetdaksüogo.

Tanü lungkak aitba sentong nung nisung aika adenshi aser parnoki "backdoor appointments" anema lungkak ait.

December 17, 2024 nü state sorkari sangdong ka nung assistant professors aser librarians 147 aniokba anema CTAN aser NNQF teloktemi lungkak aiter.

Iba sentong nung adenertemi "Stop Nepotism, Uphold Meritocracy" aser "Right to Justice, Equal Opportunity for All"

tezülubatem amer lungkak aitogo.

Parnokisa assistant professors aser librarians shimokba lemtet meyipa agitsü aser sorkar mapa nung tashishitsü melii nisungtem shimoktsü takhangba agütsü.

CTAN aser NNQF tanishirtemi April 10, 2025 nü Chief Secretary nem memorandum ka agütsüba dak sendakba nung tanü ketdangsürtem den ajurutepa senden ka amen.

Parnoki züluba memorandum nung June 6, 2016 sülen shimokba mapa ajak Nagaland Public Service Commission (NPSC) ket nung agütsütsü shia lir.

Tanü Higher Education Department-ia telangzüba ka agütsüba nung tang ashishitepba appointments ya ya fixed-pay

basis nung mapa nung shimokertem lir ta shia lir.

Parnok ya academic needs atema shimok aser non-sanctioned posts lir. Mapa tazüng ajak NPSC ket nung agütsüogo aser tang mapa tazüng talila kecha mali Higher Education Department-i ashi.

Ajisüaka, CTAN aser NNQF-i item onük magizüker aser department-i inakyim lateta aliba ama mesüi regularizing mapa inyak ta tai tongloksüogo.

Parnokisa April 17, 2025 nungi Higher Education Department shibangtsü metetdaksüogo aser sorkari ashishitep aketba tetutyuba meyipa magi tashi aser merit-based recruitment metenzük tashi parnoki lungkak aitsü ta CTAN aser NNQF teloktemi metetdaksüogo.

FGI-i CMHISaser ABPM-JAY mapa shitak meinyaker: NHPS

Dimapur, April 16, 2025

(TYO): Department of Health & Family Welfare, GoN kübok Nagaland Health Protection Society (NHPS)-i sangdong ka nung Future Generali India Insurance Co. Ltd. (FGI) ajanga Chief Minister Health Insurance Scheme (CMHIS) aser Ayushman Bharat Pradhan Mantri - Jan Arogya Yojana (ABPM-JAY) atema health insurance senotsü magütsüba indang osang ka metetdaksüogo.

CMHIS aser AB PM-JAY ajanga Nagaland nung healthcare services tajung agüja aruogo ajisüaka FGI ajanga mapang talanglang agiba ajanga empanelled hospitals asoshi timtem agütsür aser beneficiaries dak kongshir ta HHPS-i ashi.

1. Outstanding Claims Status (April 14, 2025 tashi atema):

Total Claims Submitted: Rs. 178.96 Crores

Total Claims Approved by FGI: Rs. 147.65 Crores

Total Claims Paid by FGI: Rs. 99.28 Crores

Total Claims Pending (Under Process/Approved but Payment Pending): Rs. 48.81 Crores

Total Claims Rejected by FGI: Rs. 8.40 Crores

December 2024 nung FGI-i hospitals kar nung tim mesüi senotsü agizüka agiba indang

teblemtüsü lemsatop aser iba dang "fraud dossiers" ta ajar. Iba atema NHPS-i bushisüngdanga arur aser internal audit teams o district ketdangsürtem dang nungi records repringdanga liasü ta NHPS-isa metetdaksü.

FGI-i tiyazü ta benoka alibba ken o teimbaka shitak liasü mesüra NHPS ajanga bushisüngdanga rongnung dena liasü. FGI-i ken o benokba teimba ka atema documentary proof maliasü aser NHPS-i parnok den amalitepa inyakba den külemi joint verification tenzüksü ashi saka parnok nungi telangzüba kecha mali ta NHPS-isa ashi.

FGI-i empanelled hospitals ajanga ashikülak mapa inyaker ta shir senotsü magütsü sota lir aser iba ya National Health Authority (NHA) ajanga Guidelines for Recoveries and other Actions Post Confirmation of Fraud and other Irregularities den meputep lir. Maneni, FGI-i amalitep maliba ajanga senotsü agütsüba nung menur saka tesüba nung ibala ken o tem joint physical audits ajanga angatetteptsü nangzüktepa lir ta NHPS-isa metetdaksü.

State sorkari ashikülaka senotsü agiba meyipa angutsüba maparen nung yariteptsü aser temerenshitsü agütsütsü ta aiben nangzüka aser Nagaland Private

Doctors' Association (NPDA)-ia aibelena inyakba hospital tem merenshitsü shiaka FGI nungi telangzüba kecha mali.

State sorkari FGI nem contract agreement nung aliba ama Rs. 91.99 Crores full premium agütsüogo ta NHPS-isa ashi.

FGI-i senotsü magütsü sota ayuba ajanga shirangertem aser empanelled hospitals nung kongshiogo. NHPS-i hospitals ana ita trok atema empanelment nungi agienogo aser iba hospitals ana nungi senotsü meyipa angutsü mapa tenzüko aser ashikülaka agiba putetra maneni sen meyipa agitsü ta NHPS-isa metetdaksü.

Nagaland nung health care delivery den sendaktepa alir ka ama NHPS-i Nagaland nung private EHCPs ajak dang services maneni agütsütsü mepishir aser Department-i senotsü magütsüba ken o angatetteptsü merangdar ta NHPS-isa metetdaksüogo.

Iba ken o ajanga empanelled private hospital-i CMHIS aser PM-JAY kübok cashless services agütsütsü memulunga shirangertemi Government hospital, CIHSR Dimapur mesüra state adena orr empanelled hospital mashii ka nung anepalutsü akok mesüra NHPS helpline 1800-202-3380 den tongteptsü akok ta ta Nagaland Health Protection Society-i metetdaksü.



April 15, 2025 nü NFHRCC-i department ketdangsürtem den Niuland sector nung Foothills Road yangluba repringdanga senzüdang agiba noksa ka angur. Iba tesem nung River Dadi madak 36.58 m(120ft) span Galvanised double lane modular Steel Bridge kanga junga yangludar aser physical works 20% aser cross drainage & protection walls 40% renemogo ta Media Cell, NFHRCC-i ashi.

Jalukie nung Horticulture training ka ayongzük



Dimapur, Rongchii/April 16 (TYO): Agri nung amendaker poksunga alitsü asoshi angazükdaktsütsü atema inyakba national level organization, Basix Krishi Samruddhi Limited (BKSL) ajanga April 16, 2025 nü Peren district kübok CMTC, Jalukie Town nung "Modern Technologies of Horticulture" dak rangloker training sentong ka agia liasü.

Iba sentong ayongzükba nung Ministry of Agriculture and Farmers Welfare, Govt. of India kübok Central Institute of Horticulture (CIH), Dimapur, Nagaland ajanga yaria liasü.

BKSL aser CIH yagi

aluyimer indang yimya ajunga nung tashi itshidakja Good Agricultural Practices (GAP) yimya amshidaktsütsü meranger, koba khen amshir anenba yimya ka masü aser local level nung rongsen renlokdahtsür aser jenjang tajungba nung ayoktsü asoshi market balala bushitsür.

Iba training sentong nung aluyimer nisung 50 dena pei alu nung amshitsü yimya tasen angazüka liasü.

Aluyimer temi süngmok, süngsüng, jero, jemben, Naga mersü aser tsüngkum-mongpu balala nung adokba aonsotsü tem timba züsener aser Jalukie Farmers Producer Company

Limited (FPO) ajanga item aluyimer yaria parnoki züsentedba ayoker.

Bodhbarnü training agütsüba yagi aluyimer aser FPO yaria parnoki züsentedba oset tem jenjang tajungba nung yoktettsü aser Sustainable Development Goals takok angutsü.

Iba training ya Jalukie kübok yimtsüng trok awajema Jalukie Farmers Producer Company Limited indang Farmers Interest Groups (FIGs) nem agütsü, kong Izaile, Horticulture Inspector aser Sushienla, Horticulture Inspector, District Horticulture Department na shisalen sayur liasü.

Dimapur DPDB senden April 21 nü amentsü

Dimapur, Rongchii/April 16 (TYO): Ita shia amenbaDimapur District Planning & Development Board (DPDB) senden April 2025 atema Deputy Commissioner, Dimapur indang Conference Hall nung April 21, 2025 anepdang 11:00 ako nungi tenzüka amentsü, ta

Deputy Commissioner & Vice Chairman DPDB, Dimapur, Dr. Tinojongshi Chang-i sangdong ka nung metetdaksü.

Board züngsem ajak iba senden nung medema arua adentsü ayongzük, ta sangdong ajangasa ashi.

DC Dimapur ajanga metetdaksür

Dimapur, Rongchii/April 16 (TYO): Deputy Commissioner, Dimapur ajanga sangdong ka nung shimteta aliba candidates tem driving test atema District Transport Office, ISTT Complex, Chümoukedima bushia arutsü metetdaksüogo.

Test ya April 22-24, 2025 anogotem agitsü.

Form serial number 01 nungi 194 tashinung aliba candidates tem April 22 nü iba test agitsü, serial number 195 nungi 384 tashinung alirtem April 23 aser serial number 385 nungi 616

tashinung alirtem April 24 nü test ya agitsü ta metetdaksü.

Latetja aliba anogo nung candidates ajunga test agitsü tesemi anepdang 8:00 ako tashinung tonga arutsüla aser parnoki original driving license den driving teset atema pei sasa two-wheeler mesüra scooty bener arutsüla, ta ashi.

Magizükba candidate tenüng aser kuli tejangja Deputy Commissioner's Office, Dimapur indang Notice Board nung yutsütsü, ta sangdong ajangasa ashi.

Chiephobozou nung Child Rights awareness sentong ayongzük

Dimapur, Rongchii/April 16 (TYO): Nagaland State Commission for Protection of Child Rights (NSCPCR) ajanga April 16, 2025 nü DB's Court, ADC Office, Chiephobozou nung "Child Rights" indang awareness sentong ka ayongzüka liasü.

Alun Hangsing, Chairman, NSCPCR ajanga iba sentong ayongzükba nükjidong lemsatepdang, tanurtemi nüngdakba peritsütsü, tamajung nungi kumzüka ayutsü aser temeden balala nung parnok indaktsütsü asoshi iba sentong ayongzük ta ashi.

Child rights ya tanurtem mashi lenmang nung anisaba, züka merenshiba, senzüka yutsüba amala nungi kumzüka ayutsü asoshi lir, parnok education, healthcare aser dang tongtipang services tem shidak agütsütsü asoshi lir ta pai ashi.

Child rights yagi tanurtem lendong timtem, child labour, shibelenba, sexual abuse nungi kumzüka ayur ta ashi.

ADC Chiephobozou, Alemyapang Longchar-i iba sentong nung jembidang, tila tanurtem tesem ajaklen lendong timtem balala agi mela-mela meneptsüsa lir aser ibaji kechi südir süaka anendaktsütsüla, ta ashi.

Pai iba sentong nung shilem agirtem, tsürabor, kinunger, yimtsür-yimer, school, arogo, Child helpline, Child welfare committee aser police ama tongtipang stakeholders tem dang Child Rights and Protection indang awareness agüja osang prokshitsü ayongzüka liasü.

Shisalen sayur NSCPCR, Akumla Longchari-i POC SO Act indang onük nungi jembia, Legal Consultant Lichani Murry-i Juvenile justice (Care and Protection of Children) Act indang jembia aser AyinG Wangsha, Member aser Sekho Dawhuo, DCPO Kohima nungeri Rights of Children in Education aser Status of Child issues in Kohima District indang onük nungi jembia liasü.

Peren nung Student & Faculty Development Program ayongzük

Dimapur, Rongchii/April 16 (TYO): Lanurtem tajungba nung anitetsü aser educational frameworks tashi itshidaktsütsü nükjidong nung 9 Assam Rifles ajanga MIT University, Meghalaya den lungjemer Peren nung April 15, 2025 nü Student and Faculty Development Program ayongzüka liasü.

Iba sentong ya "AIM, ASPIRE, ATTEMPT, ACHIEVE" omen nung ajemdaker ayongzük, kong Peren district nungi kaketshir 400 dak tema den tesayur 40 dena liasü.

Anogo tepiyong agiba sentong nung 'career planning, soft skills enhancement aser effective communication' tsütsü lenmang balala lemsatepa liasü.

MIT University, Meghalaya indang Vice Chancellor, Dr. Malhar Pangrikar-i anir iba sentong nung soft skills aser career tsütsü telemtetba tajung

agitsü indang shisa lemsatepa liasü.

Par University indang Faculty Development Program ajanga New Education Policy nung rangloker Teaching-Learning Pedagogy tasen agüja tesayur nem academic excellence atema tangazükba tasen agüja liasü.

Sentong nung Major Pranav, 9 Assam Rifles ajanga kaketshirtem dang Indian Armed Forces nung career lenmang tajung aliba, entry schemes, eligibility criteria indang lemsatepa liasü.

MIT University, Meghalaya nung Manager, Abhijeet Dwivedi-i lanur mapa manguba tebilemtsü indang jembidang technology tasen amshia skills tsütsü tawa aliba nung apu alatsü aser digital putu nung yimya balala amshia mapa inyaktsü maongka anguba indang lemsatepa liasü.

Lengrijan nung Healthy Baby Show ayongzük



POSHAN Pakhwada 2025 nung shilem ka ama Lengrijan Village Council Hall, Dimapur nung April 16, 2025 nü Healthy Baby Show alidang tangokba noksa ka nung ketdangsür aser shilem agirtem angur.

Dimapur, Rongchii/April 16 (TYO): Rashtriya POSHAN Abhiyaan kübok tang telidak POSHAN Pakhwada 2025 nung shilem ka ama Lengrijan Village Council Hall, Dimapur nung April 16, 2025 nü ita trok nungi 18 tsüngta tanur atema Block Level "Healthy Baby Show" ka ayongzüka liasü.

Iba sentong ya Child Development Project Office, Dimapur (U) aser District Hub for Empowerment of Women (DHEW) Dimapur, Department of Social Welfare ajanga Health & Family Welfare aser RD-NSRLM den lungjemer ayongzüka liasü.

Sentong nung Limasangla, CDPO Dimapur (U) ajanga POSHAN Pakhwada indang tongmelang agi lemsatepdang, tanur, teinlonglong tetsür, mashisa aliba tetsür aser nubentsüa aliba tetsürtem asoshi malnutrition, anaemia aser childhood obesity indang tebilemtsü bentettsü aser awareness agütsütsü mechi sorkari tenzüka lir ta ashi.

Iba campaign yagi Jan Andolan - people's movement - jungmesoa lokti tentet balala aser arogo densema nutrition aser health atema awareness prokshir aser inyakyim ya küm tepiyong alir, koba March ita tali inyaker aser iba yongji POSHAN Maah (Nutrition Month) ta ajar, ta lai ashi.

Iba campaign ya talisa 'first 1000 days' - mashisa akumba mapang nungi tanur sor küm tanabuba ajungba mapang tashi - nung rangloker tetsü aser kinü

tanur achi-ajemtsü, tajangzük angur atema digital accessibility aser takum libaliru yimya tajung ajanga tanurtem temang tuozük tali akumba amala nungi kumzüksü asoshi lenmang balala nungi yarir, ta ashi.

Laisa tanur sozüker ghonda ka majungdang yongi tetsü mama yongdaktsü tenzüka, ita trok tetsü mama kisüng agütsüba, ita trok sülen danga chiyongtsü agütsüba, küm ana tashi maneni mama yongdaktsüba indanga jembia liasü.

Tanur arishi den apet mapang shidak nung chiyongtsü tabu balala agütsüba aser mürekmejua alitsü indanga lai rateta ashi.

Iba sülen Vizosuto Khanyo, District Coordinator PMMVY ajanga Pradhan Mantri Matru Vandana Yojana (PMMVY) indang tongmelang agi rateta ashi.

Khanyo-i ashiba agi, iba scheme kübok temsüa aliba tetsürtem nem mezüng tanur asoba atema instalments ana lemsar sen 5,000 teyari agütsür aser tanabuba tanur ya tetsür asünungbo ano sen 6,000 agütsür aser ibaji ajanga tetsür asoba tsütsü yimya tamajung amshiba melenshitsür.

Iba scheme ya Anganwadi services ajanga agütsür ta ashi aser mashisa akumba, antenatal check-ups aser tanur immunization agiba indang kera registration agitsü ajungshia liasü.

Nüburtem dang anasatiba Anganwadi Centre, CDPO office mesüra District Hub for

Empowerment of Women (DHEW) nung iba scheme atema apply asütsü ayongzüka liasü.

Iba teyari agitsü temsüa aliba tetsür temi Aadhaar den sendaktepa aliba bank account aser BPL cards, SC/ST certificates mesüra E-shram cards amala documents tejangja nüngdaker ta ashi.

Khanyo-i stakeholders tem dang iba indang awareness agüja tetsürtem iba scheme nungi teyari agitsü ayongzüka liasü.

Iba scheme ya PMMVY web mesüra mobile app ajanga online application agütsütettsü, ta pai metetdaksü.

Anganwadi Board Chairman, T.L. Toshi Longchar-i iba sentong nung jembidang department-i mapa meranga inyakba atema pelaba lemsatep aser nüburtemi item osang dangar nema agütsütsü asoshi iba ama sentong mapang shia aginung ajungtsü, ta ashi.

Grassroots tashi tonga arua iba ama scheme indang lemsatepba nisung ajak nem tongtipang sorkar scheme tem agütsüba asoshia department dang pelaba lemsatepa liasü.

Medical Officer, RARC, Dr. Neha Mech ajanga healthy babies shimtsü atema criteria rateta ashi aser Healthy Baby Contest agia liasü.

Overall health indicators nung ajemdaker shimba nung takok angur nem senpet agüja liasü. Iba Healthy Baby Show nung Imtisor Ao aser Limlir nati takok ngua liasü.



New Delhi, April 16, 2025: Delhi nung aliba private school tem nung fees tali atuba anema Bodhbarnü tsüraburtemi Delhi Directorate of Education (DoE) kima longkak aitba noksa nung angur.

Centre sorkari Uniform Civil Code (UCC) atema inyaktsü

New Delhi, Rongchii/April 16 (Agencies): BJP indang manifesto nung tongtimbang onüktem rongnung Uniform Civil Code (UCC) densema lir; tawa Waqf Amendment Act agizükba sülen BJP sorkari UCC atema inyaktsüa akok, ta osang ka ajanga metetdaksü. Opposition party karia pusema Parliament nung Waqf Bill agizükogo, aser ibaji ajanga BJP-i aniba NDA sorkar temelung ulushir. Sorkari 23rd Law Commission dang tamalen Law Commission-i renemba UCC draft reprangshitsü atema tuyutsüa akok, ta kasa osang ajanga metetdaksü. April 14, 2025 nü Uttarakhnd state nung sentong ka nung jembidang Ato kilonser Narendra Modi-i India tesem

ajaklen UCC benoktsü atema olen ka jembiogo. Ato kilonser Modi-i, linük temzüng ajanga ajak asoshi uniform civil code ka alitsü indang shia lir, ta ashi. Pai iba dangji 'Secular Civil Code' ta aja. Ato kilonser, "Congress-i kodanga iba ya mebenok. Uttarakhnd nung BJP sorkar aruba sülen Secular Civil Code mesüra Uniform Civil Code ta ajaba ozüng benokogo," ta ashi. Osang angazükba agi, Narendra Modi sorkari kobi melii 23rd Law Commission nung Chairman den züngsemtem shimtsü. 23rd Law Commission nung chairman ji Retired Justice Dinesh Maheshwari shimtsüa akok. Yaküm September 2 nü 23rd Law Commission atema sangdong ka agütsüba sülen ita

7 jungogo, anungji kobi melii sorkari Chairman aser züngsemtem shimtsüa akok. Commission nungsa toklang züngsem anaji Advocate Hitesh Jain aser Prof DP Veram na shimtsüa akok. 22nd Law Commission-i UCC draft renema sangdongogo aser iba draft dak sendakba nung tang tashi nung tebilemba onük crore ka dak tali agizükogo. Commission-isa iba atema jembitsü asoshi organisation 30 shi ajuruogo. Sorkari UCC ajanga tajangzük balala metetdaksütsü atema public awareness campaigns agitsü aser taruba hoptatem nung Commission-i lokti tentet balala aser yimsü dak sendakba telok balala ajurua iba atema jembitsü.

US tatong Tir JD Vance-i India semdangtsü aser PM-a ajurutsü

New Delhi, Rongchii/April 16 (Agencies): April 18 nungi April 24 tashi nung US tatong Tir, JD Vance-i Italy aser India na semdangtsü. Pa den par kibong züngsem ajaki Italy aser India na semdangtsü, ta Bodhbarnü pa indang office sangdong ka ajanga metetdaksü. India semdangba mapang nung Vance-i Ato kilonser Narendra Modi-a ajurua rongsenkettzüng aser international onüktem nung o lemteptsü. Vance'er kibongi New Delhi dang masü saka Jaipur aser Agra-a semdanga

India nung nüngshi kiojentem semdangtsü sentong lir. Vance tatong Tir akümba sülen pai mezüng France aser Germany na semdanga liasü. Vance kinüngtsü, Usha Vance'er tsüraburtembo India nung intetba lir. Tatong Tir ka kinüngtsü akümba sülenbo tang mezüng lai India semdangtsü. Yaküm US election nung JD Vance tatong Tir shima liasü. February ita nung Ato kilonser Modi-i anogo ananü United States semdanga liasü. February 12 nü Modi Washington, DC tonga oa liasü. India aser US na tsüngda

shishilembaba, defence, energy aser technology sectors nung tesendaktep ano tajungba akümtsü nükjidong nung pai US semdang. Iba mapang nungji India-i US nungi import asüba osettsüset balala nung saru dollar sen billion 23 shi nungi tesadang ajemtsü atema melungogo. 2030 küm tashi nungbo US aser India na tsüngda shishilembabaji dollar sen billion 500 ajungtsü nükjidong lir. Modi aser US Tir Trump natasa defence partnership tasen yanglutsü aser regional security atema amalitepa inyaktsü asoshi jembiogo.



April 16, 2025 nü Indian Air Force indang tayimtsü ka nung kisüjensüba oset Mandalay airport tonga bener otsüba sülen truck nung oshiketba noksa nung angur. Tawa Myanmar nung menoknok lendong tulu atalokba sülen India-i Myanmar nem teyari balala agütsür.

BJP ya Muslim anemertem lir: Mamata Banerjee

Kolkata, April 16 (Agencies): Bodhbarnü Trinamool Congress tongti lenir aser West Bengal chief minister, Mamata Banerjee-i, BJP ya Muslim anemertem lir aser parnoki Waqf ozüng agizüktsü atema tasa asa, ta aitsü. Bodhbarnü Muslim nunger lenirtem den senden amenba mapang nung Mamata Banerjee-i, Centre sorkari Waqf ozüng dak sendakba nung temzüng yanglushitsü melen simple majority ajanga dang iba bill agizük, ta metetdaksü. Sorkar aija lai, "Waqf Act melenshitsü asübo kechiba nenoki temzüng memelenshi? Iba Act ya two-thirds majority ajanga agizüktsüla. Iba ya majority kija agibo magizüktsüla. Kodang temzüng yanglushidir ibaji majority ajanga masü saka two-thirds majority ajanga asütsüla, ajisüaka nenoki tasa asa. Temzüng yanglushitsü melen nenoki bill benok," ta ashi. Laisa Waqf dak sendakba nung Bihar Chief Minister Nitish Kumar aser Andhra Pradesh Chief Minister Chandrababu Naidu nati ola

madokba atema aitsü. BJP aija lai, parnoki Bengal nung telemsa adokdaksüner aser la atsüngdokner, ta ashi. "Bengal nung yimjung lira ajak ajungtsü. Ozü sorkar atsüngdoktsü aser par sorkar arutsü atema BJP-i Bengal nung telemsa adokdaksüner. Kodang parnok arudir nenok chiyungtsüa anenadoktsü. Delhi nung Bengali nunger aliba tesemtem nung parnoki ango aser shi nokdangogo. Parnoki tesayurtem mapa agienogo aser tangbo parnoki, Mamata Banerjee-i telangzüba agütsütsüla ta jembir," ta lai metetdaksü. Laisa, tang BJP-i UCC (Uniform Civil Code) benokner aser iba party yagi Muslim nunger anemer, ta ashi. Trinamool Congress tongti lenir, Mamata-isa opposition INDIA teloktep dang longjema alitsü aser longjemer tasü itta raratsü ayongzük. "Iba ya kija dak sendakba onük ka masü, iba ya ajanga ajak kongshitsü. Tanü nenok anema inyaker saka asüngbo ano kar anema inyaktsü," ta laisa metetdaksü.

Justice BR Gavai-i May 14 nü Chief Justice of India tenangzükba agitsü



New Delhi, Rongchii/April 16 (Agencies): Bodhbarnü Chief Justice of India (CJI), Sanjiv Khanna-i pa melenzüktsü atema Supreme Court nung senior-most judge, Justice BR Gavai shimtsü atema tenüng benokogo. CJI Khana May 13 nü menden nungi anisüngzükba sülen May 14 nü Justice Gavai-i 52buba CJI inyaktsü atema tenangzükba agitsü. Linük Tir, Droupadi Murmu-i ketdangüsü Gavai nem tenangzükba agidaksütsü. Yaküm November ita nung Justice Khanna-i CJI tenangzükba agia liasü. Justice Bhushan Ramkrishna Gavai ya 1960 küm November 24 nü Maharashtra state kübok Amravati yimti nung aso. 1985 küm March 16 nü pa Bar nung

join süa liasü. 2005 küm November 12 nü Justice BR Gavai high court nung permanent judge aküm. Iba mapang nungjagi tenzüka pai Supreme Court indang Constitution Bench aika nung züngsema tongtimbang obendang aika agütsüogo. 2019 küm Centre sorkari Jammu & Kashmir nung Arrla 370 agienba metentsüba Constitution Bench nunga pa züngsema liasü. Ano yimtenren party tem nem senotsü teyari agütsüba scheme- electoral bonds scheme anentsüba Constitution Bench nunga Justice Gavai-i tongtimbang shilem agia liasü. 2016 küm Centre sorkari senpak 1,000 aser senpak 500 notes thinentsüba pusema obendang agütsüba bench nunga pa densema liasü.



TIR YIMYIM YIMOBILEM (EDITORIAL)

DIMAPUR THURSDAY, APRIL (RONGCHII) 17, 2025

Kümtettsü Benjong

Egypt nung Israel nung kum 400 dak tema alarsa alidang Egypt nung lu ajak parnoki inyaktsü, ki mapa ajak parnok tsüda liasü aser kiojen ajak parnoki yanglutsü. Aji oda lia lia Israel nung medenibo Egypt nung mapa kecha meinyaktettsüsa aküm. Iba jagi Mosa aser Aron nati Faroah chuba dang mepishiaka Israel nung pei limai yoktsüba pai memulung südi. Ajisüaka, kodang Tsüngremi aonung ka Egypt lima ajanga süi, iba aonung Egypt chuba Faroaher mezüng jabaso nungi tepuokdak puoka alisanger mezüng jabaso tashi aser kiset shirurudem mezüng mepuba ajak tepset saka Israel nung shir kikümdong nung san zü mezüa liasü parnokbo Kibubai kümzük. Iba jagi iba benjong dang ya English agi Passover ta ajar. Aji oda, Ao oshi nunga iba dang ya Süia Aoba mesüra Akayaa aoba benjong ta janütsüka saka Laishiba meyipertemi Kümtettsü benjong ta meyipa lir. Iba anogo ya teti bilemteta amongtsü asoshi Tsüngremi Mosa dang ashiba Anitet 12 nung angutsü. Iba mapang nungjisa Tsüngremi Mosa dang Israel nung mezüng asoba tanur aser mezüng mepuba kiset shiruru Pa nem bendanga agüjang ta ashiba Anitet 13 nung angur. Iba kasa ya tanü India nunga Southern lenbo amangba pur kibong shia nung mezüng asoba tanurbo Tsüngremi mapa asoshi bendanga agütsür. Taküm iba Passover benjong ya April 12 nungi 20 aonung anülü tashi amongtsü kechiyong Yihuda nungertemi anogo azüngba ya asenok ama masü saka anü aluba mapang nungi azünger. Atangji, Yihuda nungertemsa süaka iba Süia Aoba benjong ya Yisu dak amangertem asoshibo Yisu alima menenpurtem temenen nungi kümzüksü asoshi bendanga taküm agütsütsü renemba Temeshi aser Timtemba Hopta lir saka Yisu dak mamanger Yihuda nungertem asoshibo akhidang Anitet 12 nung shia aliba tatalokba to bilemteta amonger. Iba mapang parnoki kinunger adianu ajak külemi chiyongtsü benjong yanglur aser Tejen Laishiba nung parnok Egypt nungi anitetba otsü Haggadah kaket nungi azünger. Aji oda, Yisu alima nung aliba mapanga Yihuda nungertemi kanga reta amongba benjongji Süia Aoba benjong ya liasü, anungji Yisu aser nütsüngtema iba benjong amongtsü asoshi renemba mapang, Yihuda nung yimten yimsüsürtembo temaba putir kidang sentepa pa tepsettsü sentong renema liasü. Aji oda, külen Yisubo Bethany nung Simoner kidang chiyonga aliba mapang Martha aser Lazar na teyi tenu (Yohan 11:2) Mary-i sen tasak jenjang totzü pongdang tasen ka lapoker Yisu kolak nung mezütsüba angur. Idangji, Yihuda Iskariot-i sen paika jenjang ya nisung ka kolak nung mezütsütsü agibo sensaker nemang aji yoker lemstsü tajungba ta ashiba Yohan 12 nung tejangjaba shia angutsü. Kasa tapu nungji Yihuda Iskariot ya auer liasü ta shia angutsü. Yisu sülen anidakertem ya tangatetba aser nükjidong balala liasü, Aji oda, Pa nütsüngtemi Yisui Rome yimli atsüngteter yimsü asütsü ta bilem, anungji Yakob aser Yohan tetsüibo par jabaso ana atema Yisui kodang par lima nung government kümdir cabinet tazüngba ana agüjang ta mepishiba asenoki Mathi 20:20 nung angur. Kasaji Yihuda Iskariot-ia Yisui Rome yimli atsüngdoker yimsü asüidang pa Finance minister asütsü ta bilem südi. Ajisüaka, kodang Yisui Pa yimli alima yimten yimli masü ta shia alima nungi pilatsü tatem o jembi, idangji Iskariot Yihuda mulungjang nung Yisu sülen anidaktsü agibo Yihuda nung yimsüsür aser putir Unger sülen anidak tajungba asütsü ta bilem südi. iba jagi pai Yisu ayoktsü mulungtet. Yisu sülen anidakba mapanga Yihuda Iskariot yagi parnok telok meyong sen auyaba indang Yohan 12:6 nung shia angur. Adianutem tanüa asenoki Yisu dangbo sen temeimba kümogo. Ajisüaka, Yisu ayokba sen agibo asenok azükaru masütsü. Yihuda Iskariot ama Yisu ayokba agi takar aser yimsüsür akümtsü memerangi, Mary ama asen akaba tajungtiba Yisu nem agütsütsü merangdi!

OLEMSABANG

TEMZÜNG OZÜNG ASER O BENDANGBA (MEZUNG TANGAZÜKTSÜ)
LAW, CONSTITUTION AND ADMINISTRATION OF JUSTICE
(FOUNDATIONAL CONCEPT)

~ L. Moayanger Imchen

Senior Govt. Advocate, Gauhati High Court Kohima Bench.

(Yashi adok nungi...)

Temzüng Ozüng apokdak/adoktak/asar telemsa (Sources and classification of Laws)

1. Akhi alemli longsü putu nungi tang tashi benshia aruba yimyaliro ozüngtem (Socio-cultural and customary laws practiced since time immemorial) Chungliyimti nungi otsüla oboula nungeri amshia aruba telatet otsü, putipuyang, temzung aser tzüzüng ozüng.
2. Yimya sobaliro ajanga angateta amshiba temzüng ozüng (Laws of equity justice, good conscience, fairness and morals).
3. O bendangba bangdak ajanga latetsüba temzüng ozüng (Laws decided judicial pronouncements). Laws laid down by Supreme Court of India and by International Court of Justice UNO for member Nations/States
4. Neburi shimtetba tatartem ajanga yangluba temzüng ozüng (Laws passed by Indian Parliament and Acts passed by Nagaland Legislative Assembly)
5. Lokti molung agi lemtetba aser molungzüng agi inyaka aruba temzüng ozüng (Laws derived from custom, tradition, socio-cultural, political and anthropological both oral and documentary).
6. Sorkar yimsüsürtemi yangluba temzüng ozüng (orders, circulars and notifications issued by Governor and Chief Secretary for the State).
7. Tamangba yimsü ajanga agütsüba temzüng ozüng (Ecclesiastical laws and religious canons). Item ozüngtem ya arogo ajanga Laishiba tesayuba nung ajemdaker Khrista teyongtsü sur tamangertem dang sayuba aser agütsüba ozüngtem.
8. Linük temzüng ozüng (Constitution of India) and the Laws made and framed thereunder.
9. Alima ajunga ozüng (Charter of the United Nations and the Rights and obligations enshrined therein for all Member Nations/States.)

Kechiba Temzüng Ozüng nüngdak (Why Law and the Constitution).

Meimchir sobaliro sümedem tenzüker anüdok aser anülo ajaklen tazüokba nung tiptema alitsüba nungi temzüng ozüng tongtibangtiba nükjidong lir. Anungjiang Teyanglur Tsüngremi meimchir sobaliba tenzükdang nungi ozüng aser O bendangtsü tashi aser shisatsü agüja benshi. Akhi alemli meimchir zülü maka saka item mapangtem nunga bangzüng O agi temzüng ozüng kumer amshia aru. Kodang azüngtsü aser zülutsü meimchiri bushitet temzüng ozüng zülua rizünga ayuts? tenzü. Temzüng ozüngji kangasa tongtipangta angatet nung tanüa lokti ajak nung ozüng tejangja zülua iba dak ajemdaker lokti anir. Temzüng ozüng ajanga tajung inyaker nem temeden aser tetushi agütsür saka tamajunger aser aibelener merenshir.

Meimchir ajak dak tajung aser tamajung bendangteta metettsü shisatsü keta lir, saka nisung dak tashi mait kaji pei ajungtsüang tali bilema inyakba aser pei molungba inyaktsü jangraba shisatsü lir. Iba mokokmin jakla meimchir ajak dak aketba ya azüoktsü asoshi temzüng ozüng ya alemli putu nungi tanü tashi lateta ajangajanga amshir. Temzüng ozüngi teti kija aser lokti ajak arakpanga aniba den külemi temeten aser teinyaktsü agütsür.

Temzüng ozüng aser O bendangba yimden yimli pangdak ya alipokdang nungi Tsüngremi meimchir nem agütsüba shisarajemtem rongnung tapensatiba aser tamatiba lir. Iba pangdak rajem aser shisatsü ya ochi aser temeshiba nung teti amendaka lir. (The law and the administration of justice is rooted in the finest Divine throne).

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Delhi nung police-i Palm Sunday procession agitsü memela



Tamalen Delhi nung Palm Sunday anogomong nung Khristantemi 'Way of the Cross' procession agidang tangokba noksa nung angur.

April 16, 2025: Taoba Amongnü Delhi nung Palm Sunday dak sendakba sentong 'Way of the Cross' procession agitsü memelaba ya tim masü, ta Khristantemi aitsü.

Osang angazükba agi, Delhi Police-i, iba sentong ya akhidang nungi agia aruba sentong ka masü, ibayongji iba sentong agitsü memela, ta metetdaksü.

"Akhidang nungi agia aruba processions aser sobaliba nung benshia maruba procession naji balala. (Palm Sunday) procession ya sobaliba nung benshia aruba procession ka masü, ibayongji temepishibaji magizük," ta police-i metetdaksü.

Union Minister, George Kurian-i, security nung ajemdaker Khristanem nem procession agitsü atema temelaba magütsü; Honibarnü Hanuman Jayanti procession-a agitsü liasü, ajisüaka Hindu nunger nem-a temelaba magütsü," ta metetdaksü.

Minister of State for Minority Affairs, George Kurain-i, "Iba ama processions ajak nokdangsüsa kuli lir," ta metetdaksü.

Palm Sunday dak sendakba sentong agitsü atema police-i temelaba magütsüba atema Khristantemi dang masü saka opposition party tem- Congress aser CPI(M) nungi lenirtemia ketdangsertem aitsüogo.

Catholic Association of the Archdiocese of Delhi (CAAD)-i sangdong ka ajanga, "Iba ya taoksatsüka lir aser tim masü. Teti agia iba procession ya tesünep nung agir aser ketdangsertem den amalitepa iba sentong agir. Parnoki security aser traffic kuli agütsüogo, ajisüaka item ama sentong agitsü atema tangar nembo temelaba agütsür," ta metetdaksü.

Khristantemi küm shia Palm Sunday anogo nung 'Way of the Cross' procession ya St Mary's Church nungi Sacred Heart

Cathedral tashi agir, ta CAAD Tir, AC Michael-i metetdaksü.

Kerala Chief Minister aser CPI(M) lenir, Pinarayi Vijayan-ia, Delhi Police-i 'Kuruthola Pradakshinam' (Palm Sunday procession) agitsü atema temelaba magütsübaaji aitsütsü tetemsü, ta metetdaksü.

Paisa, iba ya linük temzüng kübok yimsü temeden anema lir, ta ashi.

Congress general secretary KC Venugopal-ia shidi ka ajanga Union Home Minister Amit dang, iba ya yimsü temeden anema lir aser nütsüng ajema alirtem ola nembangtsütsü atema inyakba lir, ta metetdaksü.

Venugopal-isa, "Delhi nung aliba Sacred Heart Cathedral-i tesüiba küm 15 tashi iba procession ya tesünep nung agi aruogo, anungji kuli tejangja makai temelaba magütsüba ya ajanga sorkari yimsü temeden atema meinyakba sayur," ta metetdaksü.

South Africa nung puer aoba America nunger pastor kümzükogo

April 16, 2025: Tawa South Africa nung sayutsüngi tesüdak mapang puer aoba America nunger pastor, Josh Sullivan kümzükogo, ta police-i metetdaksü.

Mapang tatsüka sashia khatepba sülen pastor kümzük.

Anogo pongu tejaklen prangpong amer nisung kari pastor Sullivan puer aoba sülen Mongolbar aonung Gqeberha nung pa kümzükogo.

Police-isa, pa kümzükba sülen idangyongjisa medical team kati pa temang repranga liasü aser tang pa kanga junga lir, ta metetdaksü.

Pastor Sullivan puer aoertemi pa chioktsü atema sen khanga liasü. Iba sülen South Africa nung elite police unit, The Hawks-i pa kümzüktsü atema inyak.

The Hawks team-i sangdong ka ajanga, "Intelligence osang ajanga pa aliba tesem jangjaba sülen team ka iba tesem jagi oa pa kümzük," ta metetdaksü.

"Police team ji iba tesem tonga aoba sülen kima aliba gari ka mita reprang. Gari nung alirtem jagi police anguba sülen



Josh Sullivan

ajentsü merang aser police dak injang khaloktsü. Police-ia parnok dak injang khaloktsü aser mejangjaba nisung asem kanga mejungi yiruja liasü," ta The Hawks sangdong ajangasa metetdaksü.

Anogo 5 tejaklen arrshi küm 45 pastor, Sullivan leniba nung aonung tekülem sentong tagidak mapang nung nisung pezü prangpong amer arua Tenla kidang nungjagi pa puer oa liasü.

Sullivan'er kibongji 2018 küm November ita nung South Africa nung alir. 2012 küm February ita nungi pa Maryville, Tennessee nung aliba Fellowship Baptist Church nung inyakba liasü.

South Africa kübok Gqeberha yimti nung aliba Fellowship Baptist Church ya pastor, Josh Sullivan aser pa kinüngtsü, Megan nati tentetba Arogo lir.

Brihostibar (April 10) aonung 7:00 ako meta prangpong amer nisung pezü Tenla ki telung jagi aitba sülen pastor puer oa liasü.

Tamalen par kinünger kati, "Pa puer aoertem jagi Josh tenüng meteta liasü. Nisung pezüji Tenla ki telungi aitba sülen mezüngbo Megan teka nung amer kishileni anir ao aser Josh dang, 'Josh, la ya nü kinüngtsü asü?' ta asüngdanga liasü. Iba sülen parnok la nungdok aser Josh indang gari nung pa puer ao," ta metetdakja liasü.

Josh aser Megan na ya Arogo tasen tenzüktsür missionary tem lir. Tena South Africa nung küm tenetbuba alir. 2018 küm tena US nungi South Africa-i oa liasü.

Hopta ishika tejaklen Josh-i social media ajanga, "Kiyong nung kari timtem agütsüner aser Tenla ki shibangdaksüner," ta metetdakja liasü.

ANOGO ABEN TSÜNGREM DEN

Khrista den telungjem pezüsü

"Nenok Kü Nütsüngtem"- Yn. 15:8

Yohan 15 nung item telungjem pezüsü indang jembir. Tekong itemi zügang- 5,15,20,27. Tekong 5 nenok "kongsangtem," 15 nung "tembartem," 20 nung "kilirtem," 27 nung "kulitem."

Asenok "kongsangtem" anungji asenoki Pa asoshi mapa inyaker. Asenok Pa kulitem, anungji asenoki Pa indang jembir. Kongsangtem, tembartem, kilirtem, kulitem; Aji asü nung Pa asenok taküm, aser asen tepela, aser asenok Kibur, aser asenok omen!

Anungji item mapa pezü ya tebilemba balaka pezü lir. Asenok "kongsangtem," iba jagi süngjang atangtsü indang jembir. Asenok "tembartem," iba jagi telungjem indang jembir. Asenok "kilirtem," iba jagi Yisui ashi, rishikangshitsü. Asenok "kulitem," aser iba asoshi asenok dangi Süneptsüba, Tanela Temeshi yoktsü nangzük.

Item mapa pezü jagi Khristan taküm ka jenjang shidak nung yutsür. Mezüngbuba anaji tanelaren. Tanga anaji mapa. "Kongsangtem" aser "tembartem" jagi asenok Kibuba den telungjem indang jembir. Asenok tesendaktep "kilirtem" aser "kulitem" jagi mapa aser ashiba indang jembir.

Kongsangtem jagi süngjang tangtsür! Kechiba, iba jagi tanelaren tasen kümshiba indang jembir. Tembartem telungjem tepela! Kechiba, iba jagi tanelaren maongka indang jembir. Pai mulungba ataloktsüba kilirtem- kechiba, iba jagi tanelaren merangba indang jembir. Pa asoshi tangar dang kuli asüba! Kechiba, iba jagi teinyak mapa indang jembir. Anungji asenok Pa den telungjem pezüsü akaba jagi tetezü tulu agütsür!

Anungji asenok shidak Lai nendaka bushirtem süra item telungjem pezü sü nung kecha tetsükdakba makai iba ajanga asen mulungjang nung tepela kadakja tayongzükba agütsür. Item mapa pezü asen mulung nung yur, asenok sasa item tasüngdangbatem asüngdangdi: (1) kongsang ka ama ni khrista den shidak tesendaktep lir na? (2) Ni anogo shia Pa den telungjem kar ma? (3) Alimai sempaaka, ni Pa dak tamang katetta tenzükdar ma? (4) Kotak nungi yokba Tesüneptsür ain nung ni anogoshia osangtajungji kümdanga agütsüdar ma?

Tsüngrem chirtem den lungjemba metetta aliba ajanga anogoshia temulungjang sünga temoatsü, tepela agi sünga alitsü. Asenok Pa den telungjem akaba shidakbaji teti tatem maka taküm lir. Iba metetta alibaji kotak alima nung tenzükba lir.

Chhattisgarh nung yimtsüng ka nungi Khristan kibong 6 meindok

April 16, 2025: Chhattisgarh state nung Sukma district kübok yimtsüng ka nungi Khristan kibong trok meindokogo, ta International Christian Concern (ICC)-i metetdaksü.

Khristantem jagi Khristan yimsü toktsütsü memelungba agi April 12 anogo nung yimdaklirtemi parnok ajak yimdak nungi meindok.

Khristantem meyong osettsüsetji tractor-trailer ka nung oshikettsüba sülen yimdak nungi meindok. Tang Khristan kibongtemji tejenokdak makai arem nung lidar.

Küm tenet tejaklen kibong 13-i Khristan yimsü agizüka liasü, ajisüaka tawa yimdaklirtemi parnok ajak dang Hindu yimsü dangi tanaben meyipang, ta tuyua liasü.

Mezüngbo kibong 13-i Khristan yimsü agüzka liasü. April 12, 2025 nü yimtsüng balala nungi nisung 400 shi adenshia Gram Sabha (autonomous village council)

senden mena Khristan kibong 13 atemaji o lemtepa liasü.

Iba sülen yimsüsürtemi Khristan yimsü ya yimtsüng sobaliba den meputep, ta shia Khristantemji yimdak nungi meindoktsü atema telemtetba agi.

Khristan kibongtem dangji tanaben Hindu yimsü dangi meyipang, mesüra yimdak nungi meindoktsü, ta ashi. Kibong teneti Hindu yimsü dangi tanaben meyiptsü ta nangzük, ajisüaka kibong 6-ibo parnok Khristan yimsü metoktsütsü, ta ashi.

Iba sülen village council-i Khristan kibong trokji yimdak nungi meindoktsü telemtetba agia Khristantemji yimdak nungi meindok.

Khristan lenirtemibo state nung tongti party ana- ruling BJP aser opposition Indian National Congress na tsüngda ozüng alema yimsü meyiptsü ajungshir ta aitsüteper, ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Temenen****(n)** memeshiba mapa (sin)

* Meimchir temenen nungi kümzüksü asoshi Yisu asü.

Temenen**(n)** memerük (dirty)

* Süoshi temenen kodanga masemtsüla.



Tir Yimyim

OLONG PAITEP # 7125

1			2		3		4		5	
6		7								
					8					
9				10						
						11				
			12							13
	14							15		
					16					
			17							
								18		
19										

TIPIEN

2. Teburtemi tejak nung awaba
6. T _ _ _ em
8. Tzüik ayudak
9. Nüngdakba dang timba
11. Züina ao
12. Yangi tzü angur
14. Tangar dang nungi tali
16. Senyong masü
17. Oadokdi
18. Tzü tarok
19. Yimtakir aikati iba ya ki den
külemi yanglusemer

LANGTSÜNGLEN

1. Temejangdak
3. Nisung ka mapa inyaksü nübo
4. Azüntsü asoshi mejemba
5. Tesangwa agütsüba
7. Tila masü
10. Tebenjem tetsür chanu
11. Tekolak nung inok
12. Tetsüngda
13. Tangar inyakba ka inyak
14. Tim masü ta ashi
15. Asalendong
16. Tanüdangtsü

OLONG PAITEP # 7124 TELANGZÜBA**TIPIEN :**

1. Telok, 4. Aluru, 6. Ozüing,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kiochtsü,
5. Lenti, 7. Tajangzüik, 11. Teronem,
12. Sempa, 13. Jahaz.

NAI-A YA METETTER MA

April 14, 2025 nü tetsür 6-i Blue Origin meyong New Shepard rocket nung mener minute 11 nung anünglak tonga tur aluba ajanga otsü tasen ka yangluogo. Blue Origin-i tang mezüing atema all-women crew ka yok aser parnok rongnung nüngtugu kentener Katy Perry dena liasü.

Tetsür trok rongnung tantsülaji arishi küm 70 tain Gayle King liasü aser Lauren Sanchez lenisüba kübok mission takok ngua inyak. New Shepard rocket ya suborbital flights atema yangluba lir aser iba tetezü minute 15 majungdang anünglak tonga tur meyipa alutsü akoker.

Assam aser Manipur Congress-i ED office jakdang lungkak ait**Guwahati, April 16, 2025**

(Agencies): Assam Pradesh Congress Committee (APCC) züingsemtemi Guwahati nung lungkak aitba sentong ka agidang police-i parnok tanishir aika apu.

APCC züingsemtemi G.S. Road, Guwahati nung aliba Enforcement Directorate (ED) office kima nung lungkak ait.

Indian National Congress-i linük ajungalen lungkak aittsü ayongzüikba ama APCC züingsem meyirjang aikati Rajiv Bhawan nungi ED office tashi jajayonga ao. Modi'er sorkari tashiyim inyakba anema parnoki yimyim ayima lungkak ait.

Parnoki "Modi, Go Back" aser "Amit Shah, Go Back" tezülubatam amer lungkak aita liasü.

Police-i lungkak aiterem senshidaktsütsü merangdang raratep aser iba atema APCC President Bhupen Borah, taoba MP Ripun Bora, Congress lennir Mira Borthakur, Sarukhetri MLA Jakir Hussain Sikdar aser tanga tanishirtem apu.

"Prime Minister Narendra Modi aser Union Home Minister Amit Shah nati opposition tebang nembangtsütsü atema central investigative agencies amshir" ta Congress MP Pradyut Bordoloi-i ashi.

Centre sorkari journalists aser

opposition lennirtem aser ibaji talisa Congress dak tenük yoka inyaker ta Bordoloi-isa ashi.

Jawaharlal Nehru-i India nüjiso atema raraba mapang adokba osangkaket National Herald anema Enforcement Directorate-i inyakba aitsür. Otsüsütsü osangkaket National Herald ka ama dak tenük yoka inyaksangshiba ya politics dang masü saka ozüing memelar, ta paisa ashi.

Enforcement Directorate-i tawa National Herald indang rongsentem sota ayuba aser Sonia Gandhi o Rahul Gandhi anema ken o benokba aija Congress-i linük ajungalen lungkak aitba sentong ayonga agiogo.

Enforcement Directorate ya BJP indang 'political weapon' ka kümogo ta APCC President Bhupen-ia ashi.

"BJP-i ED aser CBI amala agencies ya ola nembangtsüba hadir kümdaktsüogo. Onoki lungkak aitba ya Constitution aser Indian democracy kümzüka ayutsü atema lir" ta Bora-i ashi.

Enforcement Directorate-i April 9, 2025 nü Congress tanishirtem Gandhi, Rahul Gandhi, Sam Pitroda, Suman Dubey nunger anema chargesheet ka benok.

National Herald senotsü tim

mesüi amshiba ken o dak sendakba nung ED-i Young Indian aser Dotex Merchandise Pvt Ltd. anema chargesheet benokogo.

Manipur Pradesh Congress Committee (MPCC)-ia linük ajungalen lungkak aitba den külemi Imphal nung Enforcement Directorate office jakdang lungkak aitogo.

Taoba Manipur Chief Minister Okram Ibobi Singh aser MPCC president Keisham Meghachandra nati anir Imphal kübok Chingmeirong tesem nung parnoki lungkak ait.

Lungkak aitertemi "Down, down dictorial BJP," National Herald Zindabad," aser "Sonia Gandhi Zindabad" yimyimtem ayima liasü.

"Congress tanishirtem anema chargesheet benokba aser National Herald kiojen sotba ya tashiyim mapa aser kanga tim masü" ta Okram Ibobi Singh-i ashi.

"BJP sorkari democracy anema inyaker aser opposition melidaktsütsü meranger. Ajisüaka, Congress-i ola madoki malitsü" ta pai ashi.

Ibobi-isa Pradesh Congress Committees (PCCs) aser tanishir ajak dang tarutsü anogotem lungkak aitba sentongtem nung shilem agitsü ayongzüik.

Manipur nung mejangjaba nisungtemi KNA tanishir ki amak**Imphal, April 16, 2025**

(Agencies): Mejangjaba nisung kari Kuki National Army (KNA) nung Deputy Army Chief (DAC)'er ki amak. Churachandpur district kübok Thenthang Martinjang yimtsüing nung iba ya atalok.

KNA ya tang Centre sorkar den yimjung olemtep agir.

Nisung 20 shi kati prangpong bener arur anepdang 2:00 ako meta KNA DAC Mangthang Haokip'er kidang injang aika khaloktsü.

Iba mapang M Haokip kidang liasü saka pa anükertemi meyiper khatepba den par kidangertemi yaritepba ajanga pa jenbu.

Bodbarnü KNA-i iba

tatalokba aitsüba metetdaktsüogo aser iba mapa inyakerter dang tekaratiba nung parnok sasa bendanga agütsütsü tetuyuba agütsüogo.

Iba tatalokba atema bushisüngdang asüba sülen aibelenba putetertem ozüing tesashi agi merenshitsü ta KNA-i ashi.

**GOVERNMENT OF NAGALAND
DIRECTORATE OF PRISONS
NAGALAND : KOHIMA****NO.PRI/HQ/ESTT-559/22****Dated Kohima, the 15th April, 2025.****ADVERTISEMENT**

In pursuance of the Government letter NO.HOME/JL-03/10/DRB/22/22/77 Dated Kohima, the 17th March, 2025, Applications are hereby invited from eligible Male / Female applicants from Indigenous Inhabitants of the districts to fill up 3 (three) posts of Group D as shown under the Department of Prisons, Nagaland.

Sl. No.	Name of the Post.	Place of Posting.	No. of Posts.	Pay Matrix.
1.	Water-Carrier, Group D.	District Jail, Phek.	1 (one) nos.	Level – 1.
2.	Multi-Tasking Staff (Sweeper), Group D.	District Jail, Phek.	1 (one) nos.	Level – 1.
3.	Water-Carrier, Group D.	District Jail, Zunheboto.	1 (one) nos.	Level – 1.

- The recruitment for Water-Carrier / Multi-Tasking Staff (Sweeper) shall be held through Departmental Recruitment Board simultaneously as per the terms below.
- Applicants applying for the advertised posts of Water-Carrier / Multi-Tasking Staff (Sweeper) must be Class-V Passed from NBSE or Equivalent Qualification from other Board of School Education in India.
- Age of the applicant, as on the date of issue of the advertisement, shall not be less than 18 years and not more than 32 years with 05 (five) years upper relaxation for applicants belonging to ST category i.e. up to 37 years as per the existing Government Office Memorandum Dated the 15th October, 2024 which shall be supported by the Birth Certificate from the Department of Economics & Statistics, Nagaland.
- Serving Government employees applying for the advertised posts should submit No Objection Certificate issued by the concerned HOD along with filled up Application Form.
- Application forms can be obtained on payment of ₹ 200/- (Rupees Two hundred) only in cash from the Directorate of Prisons, Nagaland, Kohima with effect from the 21st April, 2025.
- The Filled Applications should reach the Directorate of Prisons, Nagaland, Kohima on or before the 25th April, 2025 during office hours.
- Rejected list and date of interview will be notified on the Department's Notice board on the 2nd May, 2025.

Sd/-

(RENCHAMO P. KIKON)IPS

Director General of Prisons Nagaland, Kohima.

OFFICE OF THE
KORIDANG BLOCK LEVEL FEDERATION
NAGALAND STATE RURAL LIVELIHOODS MISSION
ONGPANGKONG-SOUTH BLOCK
Mokokchung : Nagaland.

Ref. No. BLF/OngS/Est.Corres/2025-26 Dated, 17th April 2025

Post Vacancy for Accountant cum MIS Assistant

No. of post	1 (one)
Educational Qualification	B.Com / BBA with basic knowledge in Computer Application
Age Limit	30 yrs& above
Starting salary	Rs.8000 /- per month

Note:

1. Eligible applicants should belong to Ongpangkong (SOUTH) Block only and preference will be given to SHG family member.

2. Eligible interested candidate should submit their application along with resume and necessary documents on or before 30th of April 2025 to Koridang Block level Federation Office during office timing i.e (10:00am-3:00pm)

3. Short listed candidates name will be displayed at the BLF office and it will be shared through email/ whatsapp by 5th of May 2025.

4. Application form will be available at BLF office / VLO Office from 21st of April 2025. The cost of the Application form is fixed at Rs. 100/-.

5. For more queries contact -8415048661.

Necessary documents to be submitted:

1. Application form

2. HSLC, HSSLC, B.Com mark sheet & admit card

3. Pass certificate

4. Residential Proof from Village Council

5. Passport size photo(3nos)

6. All the document should be self-attested

(TEMJENTOLA)

Chairman, Koridang BLF
Ongpangkong-South Block

ALI AYOKER

At Kushiabill, Dimapur. - Contact No -

PLOT AVAILABLE AS PER BUDGET 9612242850

Rate : Rs. 265/- per Sq.ft (Negotiable) 9615777083

ALI TAYOKTSÜ LIR

1. 3 Pura. Foothill road tangshia 150 per sq.ft

2. Foothill anasa teak lu, 120 per sq.ft

3. Showuba fly over anasa 190 / 250 / 310 per sq.ft

~ Contact : 9863826159

Trump dang China tajungba: Xi iba osang bener Malaysia tongogo

Kuala Lumpur, Rongchii/ April 16 (Agencies): Southeast Asia linüktem semdanga jajaba nung shilem ka ama China Tir Xi Jinping Mongulbarnü Malaysia tongogo aser ibai shishilempatsü atema United States dang Beijing ya tajungba ta osang sangdonga jajar ama ajiteter.

Xi ya Mongulbar nikongdang Malaysia yimtiba Kuala Lumpur tonga aru, koba 2013 sülen tang mezüngbuba iba linük semdangar alitsü. Pa ya Vietnam nungi aruba lir, kong pai artificial intelligence nungi tenzüka railway terenlok tashi atema trade cooperation agreements ter dak tema nung meyongnem agütsüogo.

Pa Kuala Lumpur atongba sülen China aser Malaysia arok tejangraba aser ano region aser alima nung yimjung, tashi ita alitsü aser yimchiyimjung atema "high-level strategic cooperation" tali akangshitsü junger, ta Xi-i ashi.

Southeast Asia asoshi US Tir Donald Trump dang nungi Beijing ya tajungba ta osang bener Xi-i linük asem semdangba ya US-i alima nung linük balala dang tariffs tali meshiba ajanga züngsem 10 aliba Association of Southeast Asian Nations (ASEAN) bloc mepelai aliba mapang ka nung lir.

"Shishilempaba tsütsü US dang nungi China dak temulung alem tajungba ta asenok dang ashir. Parnok den teka amteper inyaktepba nung timtem meliasü," ta taoba Malaysian ambassador to the US aser minister of legal affairs, Mohamed Nazri Abdul Aziz-i ashi.

"PM Anwar kübok Malaysia ya China anasai aor. Aji kanga junger. Meilongi Washington amadoktsü. China den shishilempaba aser yimten yimsüsüba tsütsü tesendaktep tali tashi aitba ajanga linük anaprong ajangzüker," ta pai ashi.

Washington-i Malaysia dang trade tariff shilem 24 meshi aser parnoki US imports nung shilem 47 meshir ta tai tongloktsü, koba Malaysian ketdangsür temi magizüker.

US-i alima nung linük balala dang tariff sashia meshiba anogo 90 atema soita lir. Aser tang US nung bener oa ayokba osettsüset nung tariff shilem 10 meshir. Ajisüaka China dang tariff shilem 145 meshir.

Xi ya Kuala Lumpur nung anogo asem amungtsü aser iba mapang pai Malaysia chuba Sultan Ibrahim ibni Iskandar aser Ato Kilonser Anwar Ibrahim ajurutsü aser state banquets nung adenba sülen Brehostibarnü Cambodia-i aotsü.

America nung kodanga yamai telemsa meliasü: Joe Biden

Chicago, Rongchii/April 16 (Agencies): Küm tetenzüklen US tir menden yutsür tang mezüngbuba yimjak nung jembidang taoba tir Joe Biden-i Donald Trump administration aitsü.

"Kechisa ataloka aliar reprangdangang. Anogo 100 majungdang administration tasenbai teraksa mapa jenti inyakogo. Yamai kera ataloktsü ya tesüngmangtsüka lir," ta pai Chicago nung sentong ka nung ashi.

Social Security Administration nung nübu ajemtsüba aser temelenshi aliba indang pai tekumdangtsü ashi aser tang aliba administration-i organization anema temulung nung taku bener inyaker ta aitsü.

"Employees 7,000 mapa nungi anentsüogo. Yangji takotet ketdangsürtem dena lir. Parnoki ano meyirijang aika anentsütsü renemer," ta pai ashi.

"Parnoki tech startups nungi

shi o tejen amshir - kera ayamesoang, kechiserna raksajang. Parnoki kechiserna raksar. Parnoki mezüng khaloktsür aser iba sülen ang tenük yoker. Aser iba yongji menüngdakba nung kangshiba aser aonung mejanga motetba jenti lir," ta taoba tiri ashi.

US kodanga yamai telemsa meliasü, ta Joe Biden-i tekumdangtsü shia, "Yamai linük lemsar asenok motettsü. Yamai telemsa adoker meliasü. Temulung maka shilem 30 lir. Asenoki America nung aji angur. Aser ibaji America tia lir, koba asenoki amadoktsü makok."

Republicans temi trust fund auyatsü mechi asaa Social Security raksatsür, ta Joe Biden-i Donald Trump dak tai tongloktsü. "Ya kechiba ataloker ta nai nüsasa asüngdanga alitsü. Tang item nisungtemi kechiba Social Security nung tenük yoker? Parnoki auyatsü mechi

raksatsüner."

"Aser kechiba parnoki auyaner? Aji asünung dang billionaires aser corporations tulu indang tax jenti ajemtsü. Parnoki 2017 tax cuts ya teti atema kumdaktsüner, koba ajanga America nunger takartem aser corporations tulutem kanga ajangzüker. Aji sen \$5 trillion jenjang asütsü. Aji menoktsü atema parnoki sen \$5 trillion ya kolen nungi angutsü? Parnoki maneni sorkar nung sen taruba dang nungi teindokba timba sayutsü. Parnoki teti linük sentsü tali kumdaktsütsü aser tesem kar nungi iba sen agitsü," ta Biden-i ashi.

Biden ya matamabensar indang temeden asoshi sentong ka ayongzüka nung jembia liasü.

Social Security Agency (SSA) yagi US nung mapa nungi anisüngzüker ngur mesüra matamabensaba mechi mapa meinyakteter nem teyari agütsür. Iba scheme yagi America nunger nisung million 67 shi yarir, aser item ya timba teintet rogotem lir.

Elon Musk indang Department of Government Efficiency ajanga February ita nungi iba agency nung mapa inyaker anentsür aser mapa 7,000 agentsü nükjidong lir.

Musk-i iba social security ya "Ponzi scheme tulutiba" ta ashir.

Peru-i taoba tir Humala tepuokdaki yok

Lima, Rongchii/April 16 (Agencies): Peru nung okadak kati taoba tir Ollanta Humala aser pa kinungtsü Nadine Heredia na küm 15 tepuokdak ayutsü obendang agütsüogo. Tena ya Brazil indang construction firm Odebrecht-i USD million 3 aser iba mapang Venezuela tir Hugo Chavez-i aniba sorkari USD 200,000 agütsüba mashiyimi amshiba atema aitsüogo.

Mongolbarnü obendang agütsüba sülen arishi küm 62 tain Humala ya custody nung ayu aser police station ka nung puoka liasü, saka pa kinungtsüi Lima nung Brazil embassy nung jenoktsü atema mepeshiogo, ta Peru indang Ministry of Foreign Affairs-i metetdaktsü.

2016 küm ken o benokba sülen iba ken o ya küm asem tashi angadangogo aser Humala-i ashiba agi, iba ya

political persecution ka lir. Pa o katsüri Mongolbarnü obendang agütsüba anema ken o benoktsü sentong lir.

Prosecutor temi ashiba agi, 2011 küm Keiko Fujimori den tir atema toktepba mapang Humala-i Nationalist Party ajanga ozüng alema senotsü agizüka liasü.

Humala ya mapa nungi anener aliba military officer ka

lir, aser pai 2011 nungi 2016 tashi tir liasü. Pa Peru nung lenirtem puoka ayutsü atema police base ka nung yanglua aliba tepuokdak ayutsü akok.

Taoba tir Alejandro Toledo aser Pedro Castillo nata kasa tesem nung puoka lir aser asür Alberto Fujimori-a 2023 küm mechiok tashi ita 16 iba tesem nung yua liasü.

Toledo shiba 2001 nungi 2006 tashi tir liasü pa sorkar contract melena sübokrem USD million 35 meshia agiba atema küm 20 dak tema tepuokdak ayutsü taoba küm o bendang agüja liasü.

Taoba tir Pedro Castillo-a, 2022 küm Congress loksatsütsü merangba sülen obendangba mapang tang sota yua lir.

2019 küm taoba tir Alan Garcia, pasasa khaseta asü. Police tem pa aputsü aoba mapang pasasa khaseta asü.

Gaza-i humanitarian teyari kecha meyoktsü: Israel

Jerusalem, Rongchii/April 16 (Agencies): Israel-i Bodhbarnü ashiba agi, parnoki maneni Gaza-i humanitarian teyari kecha meyoki nokdanga ayutsü, kong Israel nunger sepaitemi tanen makai amakba ajanga Palestine nunger litsü ya leper tulu ka kumdaktsüogo, ta medical charity kati ashi.

March 18 nü nungi Gaza Strip ya anüng aser ali ajang amaka tenzükogo aser iba ajanga Hamas den ita ana atema ceasefire benoker aliba tembangdakja liasü.

Ajisüaka Israel-i March 2 nü nungi Gaza-i teyari kecha bener meyoki nokdanga lir aser military-i maneni jenjang agiba

mapang timtem tekangshi maneni tamajungba küma odor. Teküzmükertemi ashiba agi, Bodhbarnü nisung 11 tepsetogo.

Defence minister Israel Katz-i Bodhbarnü ashiba agi, Israel-i teyari meyoktsü atema maneni tenokdangba agütsütsü.

(Maneni tapak 8 nung...)

ISSF World Cup: Suruchi Singh-i gold medal angu



Rongchii/April 16, 2025

(Agencies): ISSF World Cup nung India tsür Suruchi Inder Singh-i 10m air pistol event nung külem India tsür Paris Olympics medallist Manu Bhaker ajateta gold medal nguogo. Iba asaya nung Bhaker-i silver medal ngua liasü.

Arishi küm 18 tain Suruchi, shibai tawa mezügbuba World Cup nung medal ngua liasü, lai 24-shot final nung point 243.6 angu aser la Manu dang nungi 1.3 agi timba liasü. Kasa asaya nung China tsür Yao Qianxun-i

bronze medal angu.

Kasa anogo tebur 10m air pistol asaya nung Saurabh Chaudhary-i bronze medal anguba sülen India nung asayartemi sentsü ajak nung medal ngua liasü.

Peru yimtiba nung iba asayamung nung tetsür 10m air pistol asaya amokbanger asayaba sülen India team-i medal asem ngua parnok tang temaba jenjang nung lir aser parnok sülen China lir, shirnoki tebur air pistol asaya nung gold medal nguogo.

60-shot qualification round asayaba mapang India tsür la ana ya final-i aitsü ta jangjar liasü. Qualification nung Suruchi-i point 582 ngua la tanabuba nung aser Manu-i point 578 ngua la pezübuba nung liasü.

Kasa asaya nung India tsür Sainyam-ia point 571 ngua la 11buba nung liasü.

Final nung Suruchi jenjang balaka nung liasü aser lai kanga junga asaya-a shot pongu sülen la tanabuba jenjangi atu.

Mezüngbo Yao tejakdang liasü aser manur pezübuba aser Uruguay tsür Julieta Jimenez tasembuba nung liasü.

Tanabuba series sülen Yao sülen China tsürsa Meng Yufei liasü aser Suruchi o Manu na tasembuba aser pezübuba nung liasü.

Iba sülen asayartem kanga tokepba asaya aser tatem nung Suruchi-i tajungba asayateta lai gold medal ngua liasü.

Suruchi-isa, Buenos Aires nung 10m air pistol mixed team asaya nung Saurabh den külemi bronze medal ngur liasü.

Concacaf-i 2030 atema 64-team World Cup sentong magizüker



Victor Montagliani

Rongchii/April 16, 2025

(Agencies): Concacaf tir Victor Montagliani-i, 2030 tebur World Cup nung team 64 asayatsü atema benokdangba magizük.

Iba sentong ya South American governing body Conmebol-i benok, koba Uefa tir Aleksander Ceferin aser Asian Football Confederation (AFC)-ia magizüki liasü.

2030 küm iba asayamung ya Spain, Morocco aser Portugal nung ayongzüka asayatsü. Asayamung nung mezüng asayatem Argentina, Paraguay aser Uruguay nung asayatsü renema lir.

2026 World Cup koba United States, Mexico aser Canada nung asayatsü renema lir, iba asayamung nung taoba mapang ama team 32 dang masü team 48 asayatsü.

Ajisüaka Conmebol-i, asayamung tenzüker küm 100 ajunga nüngdem nung 2030 küm

linük timba asayadaksüner.

"Tebur World Cup team 64-i atsülangtsü benokba ya asayamung atema aser football ecosystem, national team tem nungi club tetoktepba, league aser asayartem atema tapet masü ta bilemer," ta Montagliani-i ESPN dang ashi.

"Team 48 asayatsü aliba World Cup dena tang tashi masaydang lir, anungji nibo team 64 kümdaktsütsüba indang yabo mejembi tajungba asütsü ta bilemer," ta pai ashi.

Concacaf ya North America, Central America aser Caribbean nung football asaya ahaayangba lokti tentet lir.

2026 World Cup nung team 48 asayadaksütsü asoshi 2017 küm Fifa congress nung telemtetba agia liasü.

75buba Fifa congress ya Paraguay nung May 15 nü amentsü aser iba mapang Conmebol-i benokba onük ya sensak asemstsü imlar.

Parnoki benokba ya agizükra 2030 küm World Cup nung asaya 128 asayatsü, koba 1998 nungi 2022 küm tashi asaya aruba format nung asaya 64 asaya aruba dang nungi anasü agi timba asütsü.

March ita Ceferin-i, iba tebilemba ya majung ta ashiba den AFC tir Sheikh Salman bin Ibrahim Al-Khalifa-ia iba ajanga timtem adokdaksütsü, ta ashi.

LA 2028 Olympics nung cricket ya Fairgrounds nung asayatsü

Rongchii/April 16, 2025

(Agencies): Küm 128 sülen Cricket asaya ya Olympic nung LA 2028 Games nungi asaya tenzüksü. Iba asaya ya Pomona, South California kübok Fairgrounds nung asayatsü ta asayamung ayongertemi metetdaksüogo.

Olympics nung cricket ya T20 format nung asayatsü, koba taoba mapang 2010, 2014 aser 2023 küm Asian Games nung tetsür aser tebur naprongla asayaogo. Birmingham nung 2022 Commonwealth Games nunga tetsür T20 asaya liasü.

"Los Angeles 2028 nung cricket asayatsüba tesem sangdongba onoki pelashishia agizüker, kechiyong iba ya onok

indang asaya Olympics-i meyipa arutsü atema renemshitsü asoshi tongtibang jenjang ka agiba lir," ta ICC mendenbuba Jay Shah-i ashi.

"Cricket ya nüngtugu asaya ka lir, saka iba asaya Olympics nung asayaba ajanga traditional boundaries tem atsülangshia terpranger tasentem atsüa arutsü atema maongka tajung asütsü. ICC tenüng nung ni LA28 aser International Olympic Committee dang pelar aser LA28 atema renemshiba aser iba asayamung nung cricket asaya takok ngua asayatsü atema parnok aser ICC züngsemtem den longjemer inyaksü yongya atar," ta paisa shisem.

LA Olympics nung tetsür aser tebur team trokrok T20 format nung asayatsü aser tetsür o tebur naprongla asaya 90 asütsü. Team shia-i asayar 15 shimtetsü. Iba osang ya International Olympic Committee (IOC) Executive Board-i April 9 nü metetdakja liasü.

LA 2028 nung cricket asayatsü atema mapanglem ya asayamung tenzüksü lia tembanga renemstsü.

128 sülen tang mezügbuba Olympics nung cricket asayatsü atema 2023 küm October ita jangja liasü. Cricket den ano baseball/softball, flag football, lacrosse (sixes) aser squash nung Los Angeles Games nung asayatsü telemtetba agiogo.

Rankireddy-Shetty nata Sudirman Cup asayatsü

Rongchii/April 16, 2025

(Agencies): Olympics nung medal ana ngur alila P V Sindhu aser world No. 18 Lakshya Sen nati anir India team Sudirman Cup Finals nung asayatsü. Iba asayamung ya Xiamen, China nung April 27 nungi May 4 tashi asayatsü, ta national federation-i metetdaksüogo.

India team overall world ranking dak ajemdaker iba temeyoktep team championships nung asayatsü atema qualify süogo. Iba asayamung nung parnok Group D nung taoba mapang champions Indonesia, anaben tashi runners-up Denmark, aser England den ata lir.

Züngsem 14 agi kümtetba India team nung tebur tarep asayar Satwiksairaj Rankireddy aser Chirag Shetty nata asayaba

angutsü, ajisüaka linük nungi tetsür tarep asaya nung temaba jenjang nung aliba tarep, Gayatri Gopichand aser Treasa Jolly nabo yiruba ajanga masayatetsü.

Tena masayaba mapang Priya Konjengbam aser Shruti Mishra na tetsür tarep asaya asayatsü aser tebur tarep asaya nung Satwik aser Chirag na backup ama Hariharan Amsakarunan aser Ruban Kumar Rethinasabapathi na shimogo.

"Asayar yiruba ajanga tetsüdaktsü kar liaka asayar shimertemi category ponguprongla nung takokba tashi asayar tajungtiba shimogo," ta Badminton Association of India (BAI) General Secretary Sanjay Mishra-i ashi.

"Asaya ka akoktsü aser

team asayamung mashika nung team tajung ka kümdaktsütsü asoshi onok joko discipline ka ana dak dang metaloker malir. Team-i group stage nung dang takok anguba masü saka medal kabo koka otsü tasen yanglutsü imlar," ta pai ashi.

Tebur kija asaya nung Sen den ano H S Prannoy-a densema lir aser tetsür kija asaya nung Sindhu den taoba national champion aser world No. 45 Anupama Upadhyaya lir.

Sindhu shiba February ita hamstring yiruba anepaluba mapang ka lir, la taoba hopta Badminton Asia Championships nung asayaogo.

Tarep temeyoktep asaya nung Dhruv Kapila aser Tanisha Crasto na asayatsü. Tena Asia Championships nung quarterfinal tonga asayaogo.

BENDANGLI OSANG : Tapak 7 nungi...

Gaza-i humanitarian teyari kecha...

"Israel policy tejangja lir: humanitarian teyari kecha Gaza-i meyoxtsü, aser item teyaritem nokdangba ya Hamas nongshitsü atema hadir tongtibangtiba lir, shirnoki teyari balala yokba ya hadir ka ama amshir," ta Katz-i ashi.

"Shingaiia Gaza-i humanitarian teyari yoktsü atema sentong mali aser iba amala teyari yoktsü atema terenemshiba kecha mali," ta paisa ashi.

Ato Kilonser Benjamin Netanyahu densema Israel nung lenirtemi, tepuoker tanungba parnok 58 chiokdaksütsü atema military ajanga pressure agütsütsüba dak alaker tanga lenmang kecha mali

Medical aid agency Doctors Without Borders (MSF)-i ashiba agi, Israel military operation aser teyari balala nokdangba ajanga Gaza ya Palestine nungertem atema

aser parnok nem teyari agütsürtem asoshi leper kümdaktsüogo.

Kasa mapang nung United Nations-ia, 2023 küm October ita rara tenzükbaba sülen Gaza nung tang humanitarian crisis tulutiba ajangshidar, ta t e k ü m d a n g t s ü metetdaksüogo.

OCHA-i sangdong ka ajanga ashiba agi, ita ka ser tesadang supply kecha marur aser medical supply tem, totzü, tzü aser tanga tenügdangba osetem kanga anünga kümogo.

Gaza Strip nung aliba Palestine nungertem dangi teyari bener yokba lenmang balala Israel-i azioka lir.

Israel-i iba tesem tanaben amak tenzükbaba sülen nisung meyrejang aika pei talidak ki toktsür jenshiogo. Tang asendenshir Gaza amak tenzükbaba sülen nisung 1,630 tepsetogo, ta Gaza nung health ministry-i ashi.

BILEMDANGANG

"Tagitsü rizügang aser tamagitsü ajak intokang."